

VENDIM
Nr. 6, datë 15.1.2021

**MBI KËRKESËN E SHOQËRISË ALBGAZ PËR SHTYRJEN E AFATEVE TË
PËRCAKTUARA NË RREGULLOREN E KRITEREVE STANDARDE DHE
KËRKESAVE MINIMALE TË CILËSISË SË SHËRBIMIT DHE FURNIZIMIT TË
RRJETEVE TË GAZIT NATYROR, MIRATUAR ME VENDIMIN E BORDIT TË ERE-
s NR. 100/2019**

Në zbatim të nenit 16, të ligjit nr. 43/2015, “Për sektorin e energjisë elektrike”, të ndryshuar; të nenit 16, të ligjit nr. 102/2015, “Për sektorin e gazit natyror”, të ndryshuar; të nenit 113, pika 1 dhe 3, të ligjit nr. 44/2015, “Kodi i Procedurës Administrative”, si dhe të nenit 26, të “Rregullave të organizimit, funksionimit dhe procedurave të ERE-s”, të miratuar me vendimin e Bordit të ERE-s, nr. 96, datë 17.6.2016; Bordi i Entit Rregullator të Energjisë (ERE), në mbledhjen e tij të datës 15.1.2021, mbasi shqyrtoi relacionin e për gatitur nga Drejtoria e Mbrojtjes së Konsumatorit, Performancës dhe Standardeve, me nr.143/3 prot., datë 30.12.2020, në lidhje me kërkesën e shoqërisë Albgaz sh.a. për shtyrjen e afateve të përcaktuara në rregulloren e kriterëve standarde dhe kërkesave minimale të cilësisë së shërbimit dhe furnizimit të rrjeteve të gazit natyror, të miratuar me vendimin e Bordit të ERE-s nr. 100/2019,

konstatoi se:

- Me vendimin e Bordit të ERE-s nr. 100, datë 21.6.2019, është miratuar “Rregullorja për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”.

- Në nenin 5.2, të kësaj rregulloreje është parashikuar që: “brenda një viti nga hyrja në fuqi e kësaj rregulloreje, por jo më vonë se muaj janar 2021, OSSh-G, OST-G dhe çdo i licencuar tjetër përkatës, do të ndërtojnë mjetet e përshtatshme duke përfshirë edhe mbi bazë IT (teknologji informacioni), të aftë për të regjistruar dhe për të mundësuar aksesin në të dhënat aktuale dhe ato historike të QPI-së.”.

- Nisur nga parashikimet e sa më sipër, ERE, me anë të shkresës nr.1237 prot., datë 16.12.2020, iu drejtua shoqërisë Albgaz sh.a. me kërkesën për informacion në lidhje me masat e marra nga ana e kësaj shoqërie për plotësimin e kushteve të parashikuara në dispozitën e sipërcituar të “Rregullores për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”.

- Në përgjigje të kërkesës së ERE-s për informacion, në datë 28.12.2020, është paraqitur në ERE përgjigja e shoqërisë ALBGAZ sh.a. me nr. 211 prot., e cila mes të tjerave kërkon nga ERE shtyrjen e afateve të plotësimit të kushtit që rrjedh si detyrim i nenit 5.2, të kësaj rregulloreje deri në 21.6.2021.

- Albgaz sh.a. argumenton këtë kërkesë duke shpjeguar se, duke marrë shkas nga kompleksiteti dhe diversiteti i objektit të kësaj rregullore, sugjeron që në vitin e ardhshëm 2021, nën drejtimin e ERE-s, të krijohen kushte për zhvillimin e konsultimeve me palët subjekt të rregullores (vendim nr. 100/2019), duke synuar kështu krijimin e një platforme teknologjike të përshtatshme, që kontribuon në zbatimin e përpiktë të standardeve të furnizimit dhe të ofrimit të shërbimit.

- Albgaz sh.a. bën me dije se, për arsye të pezullimit apo shtyrjes së projekteve të infrastrukturës së gazit, shtyrja e investimeve për ndërtimin apo rehabilitimin e infrastrukturës së nevojshme i dedikohet në masë të madhe efektit të pandemisë *COVID-19*, i cili është përtej vullnetit të mirë të shoqërisë Albgaz sh.a. në drejtim të implementimit të detyrimeve që burojnë nga kjo rregullore.

- Kërkesa e shoqërisë Albgaz sh.a., për shtyrje të afateve të parashikuara në vendimin e Bordit të ERE-s nr.100/2019, me të cilin është miratuar “Rregullorja për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”, është përcjellë në ERE përpara përfundimit të afateve të parashikuara në nenin 5.2 të këtij akti.

- Në kuptimin formal të kësaj kërkesë, rezulton se ajo është përcjellë brenda afateve ligjore të përcaktuara në vendimin e Bordit të ERE-s.

- Sa i përket palës që paraqet këtë kërkesë, vlerësojmë se ajo legjitimohet në kuptim të parashikimeve të vendimit të Bordit të ERE-s nr. 100/2019, për të paraqitur në ERE një kërkesë për shtyrje të afateve të parashikuara në “Rregulloren për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”, në cilësinë e palës së përfshirë në procedurë.

- Shpjegimet e dhëna nga shoqëria Albgaz sh.a., në lidhje me pamundësinë objektive për të përmbushur kushtet e vendosura në nenin 5.2, të “Rregullores për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”, janë të arsyeshme.

Për gjithë sa më sipër, Bordi i ERE-s

VENDOSI:

1. Miratimin e kërkesës së shoqërisë Albgaz sh.a. për ndryshimin e afateve të parashikuara në nenin 5, pika 2, të “Rregullores për përcaktimin e standardeve dhe kërkesave minimale të cilësisë së shërbimit dhe furnizimit në sektorin e gazit natyror”, të miratuar me vendimin e Bordit të ERE-s nr. 100/2019, si më poshtë:

Jo më vonë se 21.6.2021, OSSh-G, OST-G dhe çdo i licencuar tjetër përkatës do të ndërtojnë mjetet e përshtatshme, duke përfshirë edhe mbi bazë IT (teknologji informacioni), të aftë për të regjistruar dhe për të mundësuar aksesin në të dhënat aktuale dhe ato historike të QPI-së.

2. Drejtoria e Mbrojtjes së Konsumatorit, Performancës dhe Standardeve të njoftojë palët e interesit për vendimin e Bordit të ERE-s.

Ky vendim hyn në fuqi në 1.1.2021.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti